

鐵龕詩存

鐵龕詩存卷四

短歌行

矛長不穿盾甲堅不遮弩機事與機心起伏不可數
隣翁惧虎患虎夜銜其股小兒不識狼驅狼如驅殺
勸君勿用機用機徒自苦

何嘗行

我有湛盧劍切玉不斲泥我有昆吾刀斬蛟不割鷄
路有猛虎田有鼯鼯害氣誰除顛倒離迷世人逐鼯
不逐虎匣中秋水空涕洟

長相見

利刃不如口交情不如金與君同携手步上北邙岑
骷髏化狐冠夜夜拜青林林中蟪蛄出林外蜉蝣吟
俛仰成大年各自爲古今相視忽大笑無厭唯塵心
哀哉行

瞽者視以耳聾者聽以目非不役聰明視聽自反覆
烏鰂噴濃墨潛伏亦何速漁人尋墨蹤不能逃罟罾
水母唯目蝦終日徒逐逐

咄咄歌

天行莫如龍地行莫如馬觀化冥伯丘遊行與上下
甕中躍醯雞駭視聲啞仰愁龍掉尾俯俱馬跼蹐
鼓腹莫奈何醯沫橫噴灑

牆上蒿行

雕牆不可騎畫餅不療饑啾啾二五耦相率爲游辭
三人同訛傳遂成市虎疑鬼蜮不可得覩然負鬚眉
浩歌殛反側效此詩人詩

江南行

江水是涇水汶汙不堪澣江水自江水清光誰能亂

白鶴浴脩翎鴛鴦照文翰諸奴且莫驚我有好縑絹
買絲繡靈禽與汝長相看

駿馬行

牝爲牡黃爲驪非具隻眼誰能知鵬不能晝視雀不
能夜窺天之所欠人何能爲騏驥得主宜曠世一遇
之

白山高

白山高江水長昔年風虎雲龍翔江水長白山高今
日長蛇封豕號我欲褰裳以涉攝衣而上四顧無人

徘徊悵惘江澄澄山棱棱圖南會見起鯤鵬

猛虎行

神龍可馴不可絆猛虎可殺不可玩道傍年少呻吟
人貌雖柔曼心精悍文不讓班馬武不讓絳灌寧爲
溝壑雄不甘閼閼豢生死不後人浩然凌霄漢

遠別離

河漢不上天白日不照地天地乃無情人間復何事
萬物以情交二氣幹旋之我謂黃帝鼎湖仙去時上
騎龍背慘不怡俯視攀髯烏號者弓衣墜地動離思

行路難

巖形外張非至險至險乃在世人之笑臉水晶罇金
絲簞葡萄美酒華燈閃對面酒底起波瀾腹中利劍
口蜜掩可以驕可以諂可以褒可以貶我欲長眠夢
中魘不如歸去門常居

採藥歌

我聞東海之中有蓬瀛不死之藥服之可以得長生
方士爲此說誰能窺其情秦皇漢武骨已朽所享不
過中人壽螻蛄教我以大年方笑大椿八千歲爲春

八千歲爲秋固哉漆園叟

當來日大難

西上崑崙山會作王母客不甘山中寂還向人間謫
塵囂萬丈深人間殊偏仄來日當幾何蠻觸猶相戾
對酒且當歌莫問三生石

無可奈何行

去日不可留來日安可紀呼吸在斯須希望無窮已
黃金爲汝骨白玉爲汝齒珍珠爲汝顏汝可長不死
積錢買膏田戚戚胡底止

牆上難爲趨行

弱水之淵不可盪巨舟太華之巔不可騁驂騑夸夫
追白日渴死無人收蚩尤作妖霧觸額踣不周氣來
如山湧氣盡似荆牛快意在須臾龜策安能謀

水母篇

水母水母爾目無珠何以入我滄海湔滄海之東蓬
瀛方壺上有若木華扶疏木公會金母憑枝往來趨
告汝曰有笑予誣告汝曰無謂予愚陰陽非神妙萬
物而慙慙今者不悟日月其徂

釣魚篇

任公子踞會稽五十牯巨鈎提大魚食魚小魚食泥
一時收入罟獲齊六鰲噴怒浪崩堤折鈎裂網跳魴
魴垂天雲翼刷虹霓魍魎遁影山鬼啼江澄澄雲靈
靈桃都日朗鳴天雞

氣出唱

乾坤鑿混沌日月分兩丸天地非完璞氣雜黃土搏
六萬八千載氣運薄且寒獨有雲中君授符返真丹
乘龍出物表上結諸天歡俯首視濁世滿地湧波瀾

手掬上池水遍爲洗心肝

怨歌行

皎皎沙磧月潺潺遼水流與君初會日春風古渡頭
慷慨發豪語意氣凌九州感君深厚貌日日醉高樓
自君出漠北習與狎邪遊寄書進良言逆耳轉如仇
天漢固多岐黃河固難泐君心不可測轉與河漢侔
謂予有不信視汝眊然眸

病院閒吟二首

欲從海外覓金丹那識倉扁再世難仙佛心情空色

相山河風景異悲歡萬家榆柳更新主一片帆檣泊
舊灘潮急水飛驚病起斜陽無語倚欄杆
高樓蟠屈淨無塵滿室氤氲藥氣新夜靜瓶花香引
睡月移堦樹影隨人幾番舊雨來情話一卷新書伴
病身藉避風塵擾攘苦冲虛恬淡養精神

遊星浦

廿年乍得遊星浦四面山巒抱海溟山窟雲如仙出
岫海潮音似佛談經月光隱見隨波白樹色高低夾
道青對岸遙看名勝處中流拳石若浮星

在星浦望海

茫茫滄海逆潮流樓櫓金戈競上游三十六天風力
霸四千萬棹浪花浮岸穿螻蟻堤將潰水沸蛟龍帆
不收眼看狂瀾胥及溺空餘杜宇泣神洲

退病院歸里侍疾十四韻

退院歸吾廬吾廬殊逼陋棟傲榱亦頑三楹兩前牖
顧盼一堂中善居亦云苟薰風蔽牆南驕陽窺室右
茅茨偪四圍溽暑揮不走張翼長鳴鷄哆舌卷毛狗
粗糲惱婢奴炎熏拒親友搖風碎芭蕉息陰缺榆柳

不履亦不衫放浪形骸醜家如嵇康竈人是清涼叟
心靜境自幽熱中復何有侍疾夕復朝怡然誰與偶
小院趁夜涼情話忘時久旋臥虛窗紗明月來相守

掃墓

出城三五里景物鮮且妍驅車石門道停蓋金山前
山阿闢茂草紆迴達墓田葱鬱冒綠樹潺湲響流泉
淺萊振莎鷄密枝鳴繁蟬龜石蟠東谷磊落不知年
踞石瞭南海海闊風泠然愛此泉石趣厭彼羈縻牽
何年脫塵網結廬此山邊

夏夜獨臥

獨臥南窗下夜久風露清
虐政去酷暑羣動息無聲
明月入孤懷星斗挂前楹
耿耿望雲霓河漢鱗次生
明朝起霖雨霈然慰羣情

留別李薑隱

塵堪馳驅倦息肩病來自分得歸田
泥塗不惜同龜曳進退誰知似象牽
政論紛紜瘼國狗人心顛倒噤寒蟬
明知無補時艱策桑梓關情忍惻然

依韻答薑隱見寄

漫說礪山與帶河而今破碎已無多
十年厭看人間事面壁眞思效達摩

少年意氣邁扶桑
鞅掌風塵鬢已蒼
到底輸君泉石趣
南山文豹霧中藏

郊遊

梵宇響清磬疏林裊淡雲
流新瀉春色野曠散晴曛
聯步契淵道瑩情會妙文
沖玄逞攸盼靈詭叩奇聞
悟物思幽託濯懷含薄醺
寄顏霄漢外天地渺無垠

記夢

此丙申考試拔貢事因偶與友談及故追憶而記之用誌儆惕

光緒丙申暮冬夜我亦文場與試者茶罷更初展足
眠平明備戰風檐下忽夢虹橋跨水邊凭欄俯視水
清漣驀聞橋畔孫生語似挾陰謀向予前我意忤然
知有異掉頭急欲行相避下橋東轉見朱扉入戶仰
瞻心竊喜黃服朱衣列一堂巍巍二老古冠裳藹然
視我微含笑回首商量似論賊餘語微微聽未顯朱
衣怒色忽盈面大聲猝向青衣言誣告應施反坐譴
予心展轉正疑猜不識何人投狀來驚覺低徊思輟
試同人羣笑我癡騃強挽登車向院行文章寸晷已